

咸豐縣志卷五

武備志

歷代兵事

吾鄉自巴國開基將軍蔓子殉義保城已露戰爭之蹟戰國而後隸屬不常至蜀漢有建平連營之舉吾彥有建平增兵之謀楚蜀門戶此惟要害惟縣境與旁鄰郡縣千餘年尚未分治所遇兵事皆詳施南府志及其他郡縣志中後周而下咸來兩縣合為縣或柔遠州郡屬除恩施建始外較為文治被逮之區元改為散毛司數十年中屢梗朝命甚至合川湘黔三省官兵協力進攻而既躡旋起迄無寧歲雖曰蝸角僻處幾於螳臂當車而亦種族之見有

咸豐縣志

卷五

武備志 歷代兵事

五十五

未盡忘於中明史洪武五年正月衛國公鄧愈為征南將軍江夏侯周德興江陰侯吳良副之分道討洞蠻夏四月愈平散毛諸崗明史列傳梅思祖夏邑人張銓定遠人洪武十四年四川水盡源通塔平散毛諸蠻長官作亂命思祖等為副將軍與江夏侯周德興帥師討平之置施州衛軍民指揮使司銓封定遠伯又明史土司傳二十三年涼國公藍玉克散毛崗禽刺惹長官覃大旺等萬餘人置大西軍民千戶所舊衛志載是役有合肥徐凱者字子安初為都指揮使從玉克散毛禽覃大旺等萬餘人又討施南司土官覃大勝等斬獲甚衆先受厚賞陞副羌將軍都督冉氏家譜載成化十一年酉陽宣慰冉雲以剿賊楊尚白崖塘等處奉旨受賞

舊衛志載嘉靖中支羅土寇黃中叛勾結施南散毛二司楚撫谷
虛中遣將領永順五寨及本衛官軍攻剿施南散毛土司悉平磔
黃中於市隆慶五年參政馮成監軍副使張大業討金崗叛蠻賈
璧平之其屯兵處今名國公寨萬歷天啟崇禎以及永明偏安之
世散毛唐崖大旺東流諸土司時有不靖雜見於邢楊梅冉張氏
諸譜中而梅拱辰楊正麟二公武烈尤為卓著前清嘉慶元年白
蓮教撲入來鳳知縣康乂民督率紳士設卡防堵是時白蓮教屯
旗鼓寨前兩廣總督孫士毅統兵由茶園溪進剿旋卒於軍次年
白蓮教又自川入境經清水塘龍潭司犯宣恩咸豐十一年九月
十三日黔蜀流寇李洪糾合粵匪數萬由黔江縣城突過線壩要

咸豐縣志

卷五

武備志 歷代兵事

五十六

隘由丁寨擾咸豐縣城十五日陷來鳳縣城至十二月二十五日
因湖南兵勇阻截甚力反撲麂子峽施南協副將惠春宜昌鎮游
擊興祿都司雙慶等死之王戌正月初一日石達開由湖南過永
順里耶濟河來統衆十餘萬與來鳳大股合初二日寇咸豐黔匪
被官軍兜剿尾石回竄十四日由利川遁入蜀境所過焚燬居民
集場其避賊入洞者多遭燻斃南軍亦於是日收復來鳳縣城是
役也惠春等敗於線壩死於麂子峽其失機一由宜昌鎮某如惠
春遣援兵命將無統一由施南咸豐守土官以濟餉事畏謹敦逼
前進所致且軍無紀律置身絕地惟咸豐鄉勇戰頗力守備魏連
陞生員秦鍾俊皆丁寨人死尤烈癸亥七月石達開餘黨李福猷

回竄縣境至丁寨場開防堵甚嚴仍由張家坪沙子場繞道犯酉陽秀山邊境而去

綠營舊制

宋史屢載施州義軍勇健可用惟無一定兵額續文獻通考載明制施州衛指揮使指揮同知指揮僉事左右中千戶所千戶百戶兵領兵四千六百七十九名觀此則大田一所分領兵亦必不少惟唐氏衛志謂嘉靖以後施州兵時增時撤前額又未可據為成例又宋氏府志謂明祖以土司滋擾設衛廣屯欲使官省餽運而人自為戰也其後兵不能衛民反借民以衛兵又借客兵以衛衛則見於鄒維璉之志序是有衛而無兵矣協濟餉十年不至則見

咸豐縣志

卷五

綠營舊制

五十七

於朱光祚爭復額餉之碑是有兵而無餉矣其他免頭攬納官吏侵漁而兵枵腹雜見於章志王志者又不一蓋作法雖善而日久弊生前清一革屯里之弊而全資於帑其法較善康熙四年以荊州鎮前營游擊移駐施州衛雍正十三年改協轄左右二營咸豐縣駐左營守備一員把總一員碓心窩額外外委一員又唐崖司駐把總一員活龍坪駐外委一員咸豐縣城額兵一百一十七名唐崖汛額兵五十七名活龍坪汛額兵一十九名乾隆以後時有撤減至咸同年間兵額猶存十之八同治十二年施南設操防營卽就額兵一千二百餘名揀選二百名逐日操練巡防各縣近十年內裁汰綠營遇有鄰境盜匪告警全恃省派巡防軍駐紮巡衛

迄去年咸豐綠營兵弁一律裁盡施南又有新軍一營輪派梭巡
以助防軍之不及國變後防軍一律改編陸軍而兵式上耳目為
之一新矣

俸餉

駐咸守備一員合俸薪養廉蔬菜心紅馬匹額領銀三百三十一
兩五錢八釐把總二員合俸薪養廉馬匹額領銀各一百四十六
兩八錢外委一員合養廉馬戰餉米馬乾額領銀五十四兩七錢
二分確心窩額外外委領馬戰餉米馬乾銀三十六兩七錢二分
舊制馬兵每名額領銀三十六兩七錢二分戰兵每名額領銀二
十四兩五錢二分守兵每名額領銀十四兩五錢二分舊縣志載

咸豐縣志

卷五

俸餉 塘汛

五十八

駐咸馬兵三十一戰兵二十七守兵一百三十七共一百九十五
名證諸府志僅多額兵二名當綠營未議裁撤之時每年應領兵
丁餉銀三千六百七十八兩八分合官弁俸銀七百十五兩七錢
四分八釐每年應領帑銀四千三百九十餘兩以作防守本省門
戶之用

塘汛

舊制咸豐縣守備把總分防十二塘每塘兵五名曰梅家山塘忠
堡場塘梅子坪塘十字路塘土老坪塘水車坪塘張家坪塘蠻王
牌塘楊崗場塘邢家寨塘頭莊壩塘地壩寨塘唐崖汛把總分防
一汛九塘每塘兵五名曰活龍坪汛馬家池塘梳桿均塘小水坪

塘金崗塘中界坡塘兩河口塘大壩塘七里壩塘武弁官署及汛塘地面皆有圖籍備案可查歷年以來塘兵陸續裁減武弁借名侵佔除原有地段丈尺外又多越界管領之處沿襲既久遂為營下固有產業今緣營既全裁撤則此等地方為本縣人民公有物其有待於清查管理也亟矣

團練

團練卽因保甲之法分團分甲抽其丁壯而操練之以防內盜以禦外匪其說由來舊矣至湘人倡辦團練以張武功大江南北翕然從風吾咸自嘉道以來官司屢奉通飭辦團然故事奉行張弛隨時所便咸豐十一年線壩麁子峽之役丁寨鄉勇較施宜官軍

咸豐縣志

卷五

團練

五十九

為號能戰一本團之練丁也同治元年恩施知縣多壽擬定團練章程二十條通詳各大憲批飭各州縣悉遵行之是時咸豐團練頗為認真大指十家為牌十牌為甲十甲為團皆各有長重要地方每團又有正副團首之別兵械旗幟製備操演一稟成法故凡三經兵事土匪蠢蠢欲動率藉團練之力先事撲滅計自盧令慎徽以迄余令思訓袁令鏞魏令慶昭先後懲辦土匪之案多起可考而知也承平日久團練寢廢光緒中葉頗思整頓邑令奉省通飭團紳須由本府加札昭鄭重也惟時無外寇告警奉行官紳至有藉名苛派反滋擾累者議遂中寢近三年來警察法行而團練冊籍益共束之高閣不復一寓目矣自去年秋冬時局改革外匪

內奸窺伺竊發深識之士均謂目前治標之法仍非整頓民團不為功不禁拭目俟之

警察

警察之法方今文明各國通用之中國自變法以來通都大邑皆辦有警察然輿論謂惟天津漢口成都為稍有成效所費已屬不貲咸豐警察肇自光緒三十四年奉文開辦城廂警察次年並由湖北巡警道詳派警察畢業學生張光祖到縣督率辦理知縣徐培招本城游民及散役十人充學習警察宣統二年並開辦巡警教練所另招良家子弟入所學習即由省派警員更添聘本縣之諳習警務者教之以一學期畢業意在籌款陸續開辦鄉鎮警察

咸豐縣志

卷五

警察

六十

以款絀尚未即行再閱一年而革命軍遂起矣去年秋間警員警生皆同鳥獸散合計歷年開支之款雖未盡如警署所規定完全設立而費已全擲虛牝求一形式文明之影響已不可得遑問禁暴戢奸吁豈獨吾咸一邑為然哉

抑予尤有疑者咸邑地鄰川省一切風俗人心殆與川東略相近前年曾歷四川督幕至宣統二年十二月蜀督奏報憲政成績全省一百四十餘屬城廂警察盡數成立鄉鎮警察亦開辦十之二三方謂新政進步甚速而治安有慶也未幾外任繁縣乃親見盜賊之充斥劫案之層出較未辦警察時增至數倍而匪犯且因停止刑訊愈覺有恃無恐且日肆其劫盜之謀推究

原因羣歸咎於警察審判二者優柔養奸甚至嘖嘖謂警兵通匪教練所學生為賊徒逋逃藪卽有一二潔己奉公之警員至因不能偵緝盜匪惟斤斤因衛生忿爭小故致商民與警兵齟齬刁難輾轉成仇如所聞見聞警署毆警官者難僕指數豈警察之法不可行哉亦由民政部所頒定章程辦法及逐年豫備之功令一律開放未能通籌全局因地因時而量予變通耳何者以往部頒警察作用係按各國文明地方人民程度為之準則而當初事改革之會無論何國當不如是之程度均齊况以中國幅幘之廣人類之繁通都大邑以警察文明法行之但能實事求是自能收形式文明之效若僻壤偏陬又民俗剽悍素

號多盜不為嚴禁急捕桎梏而斧斤之良懦已岌岌不可終日是豈拘留罰金之令所能一概使之革面洗心者乎現在蜀事糜爛已達極點警察一舉除重慶成都兩城外無復再有一人之迹去年十月十八日成都省城兵匪肆劫一二日內公私掃盪一洗而空商店公館稍有蓄積皆被劫無一戶遺漏聞其先期調查詳確不爽毫髮者警察為之也為今之計蜀難一日不平吾咸可暫緩辦警察以團練為止暴之本圖從速妥籌經費事急則挑練壯丁日討申儆以輔兵力之不及稍緩則治城練丁若干名選練長管領之四鄉暫圍而不練或分期抽練略仿豫備後備辦法則盜匪庶可抵禦待至時局大定鄰警無聞然

後從容趨重警務以企完全文明之幸福不更秩序井然而無
掘苗助長之悔哉

咸豐縣志

卷五

敬言

六十二